

3. QK. 295

v. Giech

X 204 5101

Zb  
3368



Christliche Leichpredigt/  
Bey trawrigem Todfall vnd  
Begräbnüß/

**D**es weiland/  
Edlen / Bestrengen vnd  
Ehrvesten / Geörg Dieterichs von  
Giech / zu Wisentfels / Niderlind / vnd zc.  
Fürst. Sächs. Hofgerichts Rath vnd  
Assessor zu Coburgk.

Welcher Sonntag den 26. Julii/  
Abends umb 5. Uhr zu Bamberg / in seiner  
Behausung / seligen Todes Verschieden / vnd Dinstag  
den 4. Augusti in Krögelstein / in seiner Newerbaw  
ten Kirchen Christlich zur Erden bestattet  
worden / Anno 1607.

Gehalten Durch  
M. Paulum Luzium Pfarrern daselbst.  
Getruckt zu Coburgk / durch Justum Hauck.

ANNO MDCVIII.

BIBLIOTHECA  
TONICKAVIANA

STATS-BIBLIOTHEK  
HALLE  
(BAALE)



Handwritten text in a Gothic script, likely a title page or a page from a medieval manuscript. The text is arranged in several lines and is enclosed within a decorative border. The ink is dark, and the paper shows signs of age and wear.





Der Edlen vnd Ehr-  
 tugendthafften Frawen / Maria von  
 Biech / Gebornen von Schaumberg / zu Wisent-  
 fels / Wittwen / Meiner in Ehrngebür günstigen lie-  
 ben Frawen vnd Bevatterin

Gottes Gnad / Trost vnd Segen.

**S**ie vnd Tugendhafte / in  
 gebür günstige liebe Fraw vnd Be-  
 vatterin / Es ist ein alt Christliches  
 Sprichwort : Von Todten vnd Ab-  
 wesenden soll man nichts denn gutes / vnd die  
 Wahrheit reden / Bevorab / wenn sie das / so vil  
 allhie geschehen kan / mit löblicher Tugendt vnd  
 Gottseligem wandel erwiesen vnd verdienet ha-  
 ben. Dadurch denn andere noch / sonderbar vnd  
 gemeines standes / lebendige Mit Christen / für-  
 war in keine verachtung gezogen / sondern noch  
 gleichfals seligen ruhm vnd guten gedechtniß / viel  
 mehr zu trachten / oder beydes zuerhalten / wie  
 wir hoffen vnd wünschen / angereizet vnd bewo-  
 gen wer-

A ij

gen wer-

85  
August.

gen werden. Uebertrifft doch allen reichthumb/  
vnd sein neben andern / diß auch zwey vornehme  
stück / die ein Christ soll haben vnd ihm schaffen:  
Ein gut Gewissen bey sich / vnd ein gut Gerücht  
bey andern Leuten / die es billich rühmen. Vnd  
eins täglich / viel Jar lang / biß dermal eines / zu  
öffentlichen zeugnuß auffheben vnd nachtragen /  
Das macht ein lust zu leben / vnd gibt ein muth zu  
sterben / Wie Gott will / das wir im bendersents ge-  
horsam sein vnd volgen / so mag ein Christ wol  
sagen: Ich lebe nicht also / daß ich mich lenger zu  
leben / müste schämen / so hab ich ein guten He-  
ren / vnd fürchte mich auch nicht zu sterben.

Ambrosi.

Fast dieser meinung / war auch / Wenland  
der Edel Gestreng vnd Ehrvest Georg Dieterich  
von Siech / etc. Er war herzlich lieber / mein großgün-  
stiger / Junckherr vnd Gevatter / Da er in weh-  
render schwachheit / auff seinem Lager sich auff-  
richtet / vnd dieser wort verlauten ließ: Gern  
möchte ich noch ein weil gelebet / mein Newe Kir-  
chen gesehen vnd besuchet haben / so wirdts auff  
dißmal nit geschehen / Ich bin mein liben Gott ein  
Todt schuldig / den wil ich jetzt vnd allezeit gern lei-  
den. Sich darauff sanfft nider gelassen / vnd des se-  
ligen / nit mehr fernem / Endes / demütig erwartet.  
Wie er nun bey lebzeiten / sich Adelicher Zu-  
gend

88  
sind vnd Christliches wandels täglich beffisset/  
Das er lenger zu leben sich gar nicht geschämet:  
Also ist er in Todesnöhten gedultig gewesen/ das  
er zu sterben sich gar nicht geschämet/ gnedige  
auflösung sehnlich begeret/ im Glauben ritter-  
lich Bekempffet/ vnd nun die Kron der ewigen  
Herrlichkeit erlanget hat. Derwegen vmb vns  
wol verdienet/ das wir Ihme/ was Ampts vnd  
Christenthums halben sich gebüret/ gutes nach-  
reden/ seliges wünschen/ vnd seiner allzeit im be-  
sten gedencken. Ihme derhalben zu Christlichem  
Gedechtnuß/ vnd letzter Dienstleistung/ vns al-  
len aber zu nothwendiger Lehr/ Trost/ vnd Erin-  
nerung/ ist gegenwertige Reichpredigt/ so gut sie  
Gott mir einfeltigen Diener/ in grossen Trübsal  
bescheret/ allhie bey seiner Adelichen Begräbnuß  
gehalten/ vnd in Truck zu geben/ günstig bege-  
ret worden. Welche euch/ ewern geliebten Kin-  
derlein/ vnd gantzer Adelichen Freundschaft/ ich  
hiemit offerir vnd zustelle/ Dieselben Göttlicher  
Allmacht treulich/ vnd inen zu gunsten mich vnt-  
erthenig; befehlende. Krögelstein/ Frentag den 4.  
Septembr. Anno. 1607.

E. E. T.

Unterthentger

Paul Lus

A iij

Eingang.



## Eingang.

Esa. 56.  
Lucæ 19.

Prover. 16

**W**ol/ lieben Christen/ wir in gantzlicher hoffnung gestanden / mit verleyhung Göttlicher gnaden/ dise New/vñ zwar noch nicht gar außgebawte Kirchen / innerhalb wenig Wochen / Christlich Einzuweihen/ oder Gott dem HERN/ diß Haus/ so ihm zu Ehrn gebawet/ vnd ein Bethaus worden ist / mit Gebet / Lob vnd Dancksagung zu dediciren, vnd als sein Egenthumb / dabey er sich vorthin auch will finden lassen / billich zuzueigen / vnsern lieben Junckherrn aber / den Weyland Edlen Bestrenggen vnd Ehrwesten Georg Diterich von Biech zu Wisentzels / vnd. Fürst. Sächs. Hofgerichts Rath vnd Assessorn zu Coburg / nun mehr Gottseligen/ mit sonderlichen Ehrn/ Christlicher Frewd vnd Frolocken / wie billich gewesen were / herein zubeleiten / Gott vnd ihme für erzeigete wolthaten herzlich zu dancken / So wendet sich aber das Blat / vnd gehet / wie Salomo sagt: Des Menschen Herrschlegt seinen Weg an / aber der HERR allein gibt / wie es soll vortgehen / Homo proponit DEUS disponit, Der Mensch gedencfts / aber Gott lenckts / vnd verhengts zwar also / das vnser Frewd in Trawrigkeit verwandelt / vnd den wir gern lebendig bey vns in seinen Stul stehend gehabt hetten / Derselbe vns Todt in Sack ligend / hieher für Augen gesehet worden / dem wir das Gleid zu seinem Ruhebethlein geze-

lent

ben / ein Christliche / vnd zwar die Erste Predigt / in dieser  
Neyen Kirchen / bey seiner Adelichen Leichbegängniß vnnnd  
Christlichem Begräbniß halten vnd hören / ja mit einem  
Wort zu sagen / gar ein trawrige / vnd etwas vnzeitige Ein-  
weihung anstellen vnd verrichten sollen.

Nun weiß ich wol / das jetzt andere vnd mehr Prediger /  
vnter denen ich der jüngste vnnnd geringste bin / vorhanden  
seyen / die nicht allein diese Cankel erstlich zubeschreiten / wenn  
ordentliche Einweihung iren fortgang erreicht hette / allbe-  
reit nachrichtige andeutung befohlen / Sondern auch alle /  
vnd ein jeder insonderheit / ihzige Klag vñ Trawerpredigt / mit  
reicherm Trost / Lehr / vnd Nutz verrichtet hetten / weit besser  
denn ich / der mehr von ihnen lernen / als sie vnd andere für-  
nehme zuhörere kan lehren vnd vnterrichten.

Diueil aber vnser lieber Junckherr Gottseliger / auff  
seinem Toddbette / da er auffzeichnen ließ / wie es mit seiner  
Begräbnuß / in einem vnd andern / auch wo dieselbe solt ge-  
halten werden / von mir vnwürdigen / als seinen / leider ein  
kleine zeit / gewesenem Seelsorger / gönstlig begeret / ihme den  
Lezten Willen / mit verrichtung dieser Predigt in vnters-  
thenigkeit zu leisten / soll das ihzund in Gottes Nahmen ges-  
schehen. Auff das nun alles möge gereichen / ihme dem All-  
mechtigen zu Ehrn / vnd vns allen in gegenwertigem Trauz-  
erfall / zu kräftigen Trost / Sterckung vnseres Glaubens /  
besserung vnseres sündhafftigen Lebens / vnd endlich zu vnse-  
rer Seelen Heil vnnnd Seligkeit / ist vns darzu von nöthen

Göttliche Gnad vnnnd beystand des heiligen Geistes /

von Gott dem Himmlichen Vatter / beydes zuer-

langen / Betet mit andacht das heilige

Vatter vnser.

Text.





Text.

Der 60. Psalm Davids.

**G**ott/ der du vns verstoffen / vnd zuströwet  
hast/ vnd Zornig warest/ tröste vns wider.

Der du die Erde bewegt vnd zurissen  
hast/ heile ihre Brüche/ die so zurschellet ist.

Denn du hast deinem Volk ein hartes erzeigt/  
Du hast vns einen Trunck Weins gegeben / das  
wir daumelten.

Du hast aber doch ein Zeichen gegeben/ denen/  
die dich fürchten/ welches sie auffworffen/ vnd sie  
sicher machte/ Sela.

Auff das deine Lieben erledigt werden / So  
hilff nun mit deiner Rechten/ vnd erhöre vns.

Gott redet in seinem Heiligthumb/ des bin ich  
fro/ vnd wil theilen Sichern / vnd abmessen das  
Thal Suchoth.

Gilead ist mein/ mein ist Manasse/ Ephraim ist  
die Macht meines Hauptes / Juda ist mein Fürst.

Moab ist mein Waschtöpfen/ Meinen Schuch  
strecke ich über Edom/ Philistea jauchzet zu mir.

Wer wil mich führen in ein feste Stadt? Wer  
gleitet mich in Edom?

Wirstu





- diesen Creuxtrunck Credenzen / oder erstlich versuchen / vnd zwar desselben gern / wenn möglich / überhaben / aber doch mit Gottes willen auch muß theilhafftig werden. Vnd also spricht Augustinus, Præhibet poculum Medicus, ne idem facere timeat Aegrotus, hat der Arzt den Becher erstlich außgetruncken / darvor sich der Krancke auch nicht darff entsetzen. Vnd warumb wolte der Knecht leer außgehen / wenn der Herr selbst mit muß antretten / vnd forne an der Spiszen stehen?
2. Alle Christen / die sich daher gar offte beklagen / vnd im werck befinden / wie Gott sie pflege mit grossen maß vol Trübsal zu trencken. So darff Christus seine Jünger / die nur an gute tag / vnd täglich wolleben gedenccken / wenn das Reich Israel nach ihrem gefallen / soll auffgerichtet werden / selbst vil ein anders fragen / ob sie auch den Kelch trincken können / den Er trincken müsse / man werde traun ihnen mit der zeit / denselben auch fürsetzen. Fürwar sie haben ihn wol gekostet / vnd geht nochmals also zu / je neher die Gäste bey Christo an der Taffel sitzen / je ehe vnd öffter es an sie kompt / daß sie müssen bescheid thun vnd außtrincken / Deo proximus, Flagellis est plenissimus, Wer Gott am nechsten / den gehets in dieser Welt am aller übelsten / vnd muß ime doch / dies weil er Gott liebet / vnd ihm wider lieb ist / alles zum besten gedeyen.
3. Alle Gottlosen / welche müssen die Heffen / oder wie Ezechiel redet / den Kelch voll starcken tranck vnsers Jammers / so tieff vnd weit er ist / außsauffen / darüber das ewige Grimmen vnd Höllenpein bekommen / ja wie die trunckenen das hin fallen / vnd nimmermehr zu ehren empor kommen. Mit denen wir Christen billich nichts zu thun haben / vnd vns irer gesellschaft nit mögen theilhafftig machen.

Gleich

Gleichwol hat der liebe Gott / vnser in dem fall auch nicht vergessen / sondern etliche wochen her / bey wehrender Leibeschwachheit vnsern lieben Junckherrn / vns auch mit Bitterkeit gesettiget / vnd mit Vermuth eben wol getrenckt / das vns sonst weder Essen noch Trincken geschmecket / nun aber bey tödlichen Abgang desselben ein täglich Ehrenbrot vnd Trübsaltrunck vollend gar zu Tisch gesetzt / darbey erinnert / daß wir auch ins Klaghaus / auff seine Trinckstuben / mit David gehören / vnd einmal bescheid thun müssen. Drumb wollen wir auß abgelesenem Psalm folgende zwey Pünctlein mit einander anhören vnd betrachten.

1. Davids betrübtten Zustand vnd schweres Hauscreuz / von wem / vnd wie ihm dasselbe zu kommen?

2. Davids schönen Trost / damit er sich wider auffgerichtet / vnd den auß Gottes Wort genommen. Darzu verseyhe Gnad vnd Segen / Amen.

### Vom Ersten.

**W**enn Gott der Herr / in welches gewalt alle Menschen Todt vnd Lebendig stehen / vns täglicher Sünden halb / ein zeitliche straff / wie groß sie sein mag / pfeget auffzulegen / die zu probirung vnsern Glaubens / züchtigung Sündlichen Fleisches / ja endlicher abrechnung dieses zeitlichen Lebens soll gereichen / So gibt der Augenschein / daß sich Adamsfleisch vnd Blut / wol etwas darüber rümpfet vnd sawer sihet / Es wird aber niemandfüglich gestattet / das er mit Gott rechte / vnd will sich nicht gebüren / ihm darüber mit vngedult / murren vnd pochen etwas einzureden / wie vnd warumb er das vnd jenes übel / wie wirs ansehen / über vns ergehen lasse / dieweil wirs wol verdienen / vnd mit

B ij

vnsern

vnsern Schöpffer nicht hadern können / der doch recht bes  
 Pfalm. 51. helt in seinen Worten / vnd rein bleibet / wenn er gerichtet  
 wird. Das müssen alle Glaubigen mit Daniel bekennen vnd  
 Dan. 9. sprechen: HErr du bist gerecht / wir aber müssen vns schä  
 men / dir in wercken / so deine Allmacht / vnd freyen Willen  
 betreffen / also frech vnd vnbesonnen zuwider sprechen. Dem  
 nach aber höret Er gern / vnd ist ihme nicht zuwider / wenn  
 fromme Christen ihre Noth klagen / vnd wie groß die Trüb  
 sal sey / ihme mit Christlicher gedult anzeigen vnd zuverstes  
 hen geben. Da Beten Vatter vnd Mutter mit ihren Kins  
 dern:

Wenn wir in Höchsten Nöthen seyn /  
 Vnd wissen nit wo auß vnnnd eyn /  
 So kommen wir O HErrre Gott /  
 Vnd klagen dir all vnser Noth.

Da Beten alle Christen / David vnd sein ganzes Hof  
 gesind / wenn sich Plag vnd Verfolgung find / vnd auch im  
 Ersten theil dieses Psalms / Da er Gott frey vnter Augen  
 trit vnd sagen darff / Wer ihm vnd seinen Königlichen Land  
 volck so vil übels geschehen lasse / von wem ers habe? Gott  
 spricht er / Der du vns verstoffen vnnnd zerstreuet  
 hast / vnd zornig warest / Tröste vns wider / Der  
 du die Erde beweget vnd zurissen hast. Heyle ihre  
 Brüche / die so zurschellet ist / Denn du hast deinem  
 Volck ein hartes erzeiget / Du hast vns einen  
 Trunck Weins gegeben / daß wir daumelten. Bez  
 greiffst sein Vnglück in dreyen stücken. Spricht:

1. Gott du hast vns verstoffen / vnd deinen Zorn mächtig  
 sehen lassen.

2. Du hast die Erden zurschellet vnd zubrochen / das ihre  
 Brüche schwerlich zu heilen.

3. Du

26.

3. Du hast deinem Volck ein hartes erzeiget / das wirs nicht leichtlich vergessen. Wie denn / vnd was ist die Plag gewesen? Anders nicht denn das ihn vnd sein Volck / bey vor- 2.Reg.8.  
rigen / vnd zu König Sauls zeiten / vor vnd nach seinem Todt / ehe man wider zu ruhe kommen / ein sehr schädliche Kriegsnoth betroffen habe / vnd die so groß / daß ers über andere anstoß weit erhebt vnd sagen will: Gott habe in mehr- mahl eben hart gezüchtiget / aber es jetzt zimlich grob gemacht in seinen Zorn / so starck bey ihme angeklopffet / das er gleich mit der Lhar ins Haus gefallen / vnd dem Faß den boden gar auß gestossen habe. Drumb fasset ers endlich zusammen / vnd spricht in gleichniß: Du hast vns einen Trunck Weins gegeben / daß wir Daumeln. So vil species der Trübsal hinein vermischet / daß wirs nit dulden mögen / auff den Beinen nimmer stehen / vnd wie die Trunckenen zu boden fallen. Das kan nicht nur natürlich starcker Wein / den Mann zu Hof / vnd sonst überflüssig außtrincket / Sondern auch ein herber Creuz vnd Vermuthstrunck / denn du zuweiln / also zu reden / für eine Früsuppen herumb gehen lest / Krieg / Pestilenz / vnd andere plagen schickest / bey vns verursachen / davon das Haupt vnd alle Glieder Matt vnd Krafftloß werden / endlich mit Stumpff vnd Stiel dahin gehen. Freylich wol / lieber David / kans also geschehen / wers nicht glauben will / der muß es sehen / so offft der Zorns becher Gottes / wirdt über Herr vnd Knecht / Obriqkeit vnd Vnterthanen / die es wol verdienen / voll vnd übermessen außgeschüttet.

Was nun David klaget / vnd vor viel Jaren in seinem Königreich befunden / das ist vns heut zu tag / leider auch im Garten / mit voller Blüt gewachsen / da Gott vns auch ver- stossen / vnd sich gegen vns über die massen zornig erzeiget /

Pflm. 72  
.8.32.1.5  
Dm. 7.

Er hat vns zurstrewet / daß wir nit mehr / wie gern wir wol-  
ten / alle beyammen seyn / Er hat die Erden / vnser Grund  
vnd Boden sehr zurissen / daß die Brüche vnd Schäden  
schwerlich zu heilen. Er hat vns ein eben hartes er-  
zeiget / daß wir gar schwerlich zu trösten / vnd der Trübsal so  
voll seyn / daß wir davon Daumeln / vnd wol in Ohnmache  
sincken / vor grossen Schmerz vnd Herkleid gar vergehen  
möchten. Denn Er ja bey wenig Jahren / mit Leyd vnd  
Trawrigkeit vns vil daheim gesucht / den Edlen Stamm  
von Giech eben dünne gemacht / darauff zehen Adelige Gliz-  
der / so vil ich weiß / vnter den auch vor etlich tagen / Den  
Edlen Bestrengen vnd Ehrvesten Geörg Dieterich von  
Giech / zu Biesentfels vñ etc. Vnsern herzlieben Junckhern /  
Vatter vnd Freund / Herrschafft vnd geneigten Förderer /  
durch den zeitlichen Todt hinweg genommen / vnd vns al-  
len ein solch Trübsal verursachet / das einer / Der / Wie es  
wol sein kan / bey all diesen Todtesfällen selbst gewesen / nit  
vnbillig mag mit Jerem. sagen: Ich hab schier meine  
Augen außgeweinnet / Das mir mein Leib davon wehe  
thut / oder mit ihm ferner klagen: Ach das ich Wasser  
genug hette in meinem Haupt / vnd meine Augen  
Thränenquell weren genugsam zubeweinen / das  
Elend meines Volcks / das so zurschlagen vnd ver-  
wundet ist / durch Tödlichen Abgang Dieses Gottes  
seligen Junckherrn / den wir in allen Ständen wolbedürfft /  
vnd gar vngern verlohren haben / Als:

Thr. 2.

Jerem. 9.

1. Vnsern Kirchen vnd Pfarrherrn allhier / der Gottes  
Wort / vnd dessen Diener herzlich geliebet / vnd also geeh-  
ret / das ihme mancher offte weit geringern standes / noch  
lang



98.  
lang nicht nachthun / vnd den Pfaffen nicht über ein Achsel  
oder durch den Zaun ansehen mag / der hochmut gibts nicht  
nach / vnd macht vilmals / das niemand mehr / den arme  
Gottes Diener hönisch gehalten / übel außgerichtet vnd ge-  
schendet werden / vngeachtet / das

Contumelia legati redundat in legantem,

Die schmach dem Diener angethan /

Geht seinen Herrn auch billig an /

Der wils nicht vngerochen lan /

Wer nur ein wenig dulden kan /

So hat er auch Gottes Wort nach seinem vermögen  
gefördert / vnd darzu jetzt diese Kirchen ganz new auffges-  
bawt / Dadurch fürwar ein stäten Ruhm / vnd immerweh-  
rendes Lob verdienet / aller Obrigkeit vnd Herrschafft zum  
beyspiel vnd Exempel / das sie ob reinen Gottesdienst auch  
halten / nit allein tägliche Lust vnd Trinckhäuser / sondern  
auch Schul / Kirchen vnd Bethäuser bawen / vnd die ihr  
am meisten soll befohlen sein lassen / will sie Glück / Segen /  
vnd gedyliches auffnehmen im Regiment haben vnd behal-  
ten. Die Heyden haben ein vnzählich Gelt auff ihre Tempel  
gewendet / ganz Asia an Dianæ Tempel 220. Jahr gears-  
beitet / Semiramis die Königin zu Babylon über 369. Tons-  
nen Goldes in eine Kirchen verbawet. Wieviel mehr wil  
vns Christen / die Gottes Wort rein vnd reichlich haben /  
auch gebüren / das wir Kirchen bawen / vnd daran kein vns-  
kosten sparen.

Das hat ihm vnser Junckherr auch gesagt sein lassen /  
vnd gedacht / es sey besser Kirchen bawen / denn einreissen /  
derselben einkommens mehren / denn geringern / Wer auch  
mit geraubten Kirchen oder Pfarrgütern wil Reich wer-  
den / vnd andere Reich machen / dem muß warlich ein newer  
Glück

Glückstern auffgehen / soll er nicht endlich gar an Bettelstab gerathen / oder sonst sehrliche straffen auff sich laden. Pfarr vnd Kirchen gut / hat Adlers federn / kan wol ein grossen vorrath mit auffreiben vnd verzehren.

2. Unser liebe Herrschafft / vnd allersents guten Freund / der den Vnterthanen / bevorab gankzer Adelichen Freundschaft / mit verstendigen Rath vnd guten vorschlag / in vielen sachen / wie sie dasselbst wissen vnd bezeugen / gar wol an gestanden / die sich seiner allezett gefrewet / vnd mit herzen lust vmb ihn gewesen sein. So haben wir Diener vnd Vnterthanen nicht nur einen Herrn / sondern warlich ein Vatter an ihme gehabt / der vns vil gutes gethan / alle förderung vñ günstigen willen erzeigt hat. Da jener vorneme Herz mit Todt abgieng / stunden die Bawern hin vnd wider im Lande / raufften jr Haar auß / vnd sprach einer zum andern / Ach vnser Vatter ist gestorben. Meinet ihr nicht L. E. Es sey vns vilen auch geschehen? Vnd wo Christliche Obrigkeit / hohes oder nidern Standes dahin stirbet / kan es ohn dergleichen Klagrede nicht abgehen / vnd werden sich der bey vns noch täglich mehr erheben.

3. Unsern herzlieben Ehe vnd Haußvattern / der mit seiner Adelichen Haußmutter über die 19. Jahr ganz friedlich vnd so sanfftmütig gelebet / daß niemaln eines dem andern ein ernstlich böses wort / sondern so fein nachgegeben / das vneinige Eheleut / nechst Gottes Wort an ihnen billig solten lernen vnd ein Exempel nehmen / auß dem Ehestand nit einen Bebestand / vnd die wenige zeit / so mancher darinnen zubringet / ihnen nicht selbst verdriesslich zu machen. Es will sonst ohn tägliche Ansechtung nicht ablauffen / welche beyder Eheleut stätte Lieb vnd Einigkeit / desto ehe dulden vnd zugleich kan überwinden. Nun aber ist die Ehe allhie  
ge

getrennet / Das Haußcreutz bey der betrübten Frau Wittib / vnd ihren Kindern / eben an dem Ort eingestigen / da ihnen / natürlich darvon zu reden / am aller übelsten will geschehen / vnd ihzige Trawrigkeit / mit voriger Frewde / sich in diesem Leben nicht wider ersetzen lassen. So ist der verstendige Rath / vnnnd gute Kirchenfreund / der Sanftmütige Junckherr vnd gute Förderer auch hin / vns allen aber das mit ein überaus Hartes erzeiget / vnd der Trübsalbecher als so überfüllet / beygebracht worden / das wirs nicht leichtlich wider außschwizen / wenn auch über lang seiner wirdt man gel fürfallen / vnnnd sich finden / das er in seiner Herrschafft des Blinden Aug / des Lamen Fuß / vnnnd ein Vatter der Armen gewesen ist / der jederman trewlich gerathen vnnnd gedienet / nitmandt übermehzig beladen vnd beschweret hat. Er wird vns nicht ehe fehlen / denn wenn wir sein bedürffen / vnd die Wunden nicht ehe wehe thun / denn wenn sie beginsnet recht zuschweren.

Hiob. 29.

Wolan / wer kan ihm / vnd wie mag denn Gott so übel thun / was hat Er des für vrsachen? Mehr denn eine / die wir zur Lehr des ersten theils behalten sollen. Denn:

1. Hat sich wol niemand dieses seltsamen vnd vnzeitigen Todfalls besorget / Aber das vns Gott den Christlichen Junckherrn vnversehens genommen / will Er traun vns danck vnnnd grobheit / bey vns vielen handgreifflich straffen / Denn wenn Er herrliche Leut bescheret / die es mit jederman / vnnnd sonderlich mit Vnterthanen herrlich wol meinen / sein wir zum theil so grob vnd vngehalten / das wir ihzrer gutthat wenig achten / vnnnd viel / wo nicht alles / übel außlegen. Hört ein einig Exempel von diesem Kirchenbau: Mit was Frewd vnnnd Herzenlust / vnser in Gott ruhender Junckherr / diese Kirchen erbawt / hat er offft erwehnet / vnd wenig

E



.es. doih

Pro. 20.

Hieron.

wenig stunde vor seinem Abschied widerholet / Aber die Un-  
 zertanen seyn theils so übel damit zu frieden gewesen / daß sie  
 darumb hinter ihme weggezogen / Andere haben fürgeben /  
 sie müssen all verderben / ja wol sein grob heraus gefahren / es  
 habe dieser vnd jener das Kirchenbawen erdacht / In summa  
 sich vngheorsam genug erzeiget / das ers selbst offte klage vnd  
 sagte : Wenn ich meinen Bawern ein Wirtshaus bawet /  
 darinnen sie köndten täglich Fressen vnd Sauffen / so würde  
 sie weniger mühe verdrissen / aber Kirchenbawen wil sie gar  
 zu sawer ankommen. Ey harr / denckst Gott / du grober Fleg-  
 gel / kanst du eins / so kan ichs ander / was gilt es ich wil dir  
 kommen / vnd es machen / das du offte seuffzen vnd bitten  
 wirst / O hette ich meinen Junckherrn noch / wolte der Kir-  
 chen noch eine bauen helffen / vnd mehr thun / denn ich schul-  
 dig were / Denckst / du seyst nun mancher mühe vnd arbeit  
 überhoben / Wie wenn du möchtest tieffer hinein fallen / vnd  
 vorigen zustand wider wünschen. Böse / böse / spricht man /  
 wenn mans hat / aber wenns weg ist / so rühmet man es. Et  
 tum deniq; homines bona nostra intelligimus, cum, quæ  
 in potestate nostra erant, amisimus.

Wir lernen Wolthat erst verstehn /

Wenn vns die auß den Händen gehn.

Aequum est ergo, ut qui noluerunt Deum cogno-  
 scere per beneficia, cognoscant eum per supplicia. Drum  
 ist billig / spricht Hieronymus : Daß wir Gottes straff an-  
 nehmen / wenn wir seine wolthat nicht erkennen. Vnsern  
 lieben Junckhern / den Gott so gnedig auffgelöset / ist gar wol  
 geschehen / wir aber müssen ihn mit schmerzen hie vor vns  
 sehen / vnd warten / was Gott zur straff teglicher Sünden /  
 vns forthin mehr mag aufflegen.

2. Wil vns Gott vnserer Sterblichkeit erinnern / der wir  
 alle

alle vnterworffen / Herr vnd Knecht / mitleiden / vñ an Reyen  
müssen / kan sich keiner auß der zech außschliessen / vnd ihme /  
wie jener Bawer wolte / ein Seidlein allein einschenden las-  
sen / oder ein besonders haben. Reichthum / Macht vnd Herr-  
ligkeit / helffen auch nicht über den Graben. So muß David  
sich auch vnter sein Landvolck mengen / mehr denn einmal /  
die gemeine noth mit Klagen vñ Tragen helffen. Der  
grosse Alexander muß endlich in ein kleinen Sarcf kriegen /  
vorhin wolte ihm die ganze Welt zu eng / vnd aller Herzlig-  
keit zu wenig werden.

Ja wol lieber Alexander / Du stirbst so wol als einander / Et

*Est commune mori, mors nulli parcit honori,*

*Debilis & fortis veniunt ad limina mortis.*

Sterben ist ein gemeines Werck /

Da hilfft kein Ehr / Macht / Kunst vnd Sterck /

Ist einer Arm / der ander Reich /

So macht der Todt vns alle gleich.

Käyser Carol / Da ihme einer mit verwunderung erzeh-  
let / ein Fürst im Reich lege sehr Kranck / vnd würde schwers-  
lich wider auffkommen / An nunc, inquit, mortalem se esse

primū didicit, quod ægrotatio quotidiana me jam pri-  
dem docuit, Will er nun erst Kranckheit vnd Sterbens sich

beklagen / Das alles muß ich fast täglich am halse tragen.

Constantinus, da er gen Rom kam / fraget seiner Rāth ei-  
nen / wie es ihme allda gefiel? D sagt er / Ich sehe die Leut hie

eben so wol sterben / als an andern orten. Zihe einer gen

Bamberg / oder gen Nürnberg / er fahr gen Rom oder gen

Benedig / Ja / Wenn möglich / Steig auff einen so hohen

Berg / da er die ganze Welt kan übersehen / so wird er täg-  
lichen Leben vnd Sterbens halben / einerley Zustand befin-  
den / vnd sprechen: Was ist / das geschehen ist? Eben das

Eccles. 1.

hervach

E ij

hervach

hervach

hervach

hervach

103  
hernach geschehen wirdt / Was istts / daß man jetzt gethan  
hat? Eben das man hernach mehr thun wirdt / mit allen / die  
auff Erden kommen / vnd keinem kein besonders machen. Als  
so hat vnsern lieben Junckhern / neben zeitlicher Wolfarth /  
das liebe Haußcreuz / welches den Todt im schild geführet /  
bisher auch eben wol daheim gesucht / mit viel schwachheit /  
Diebstal / vngehorsamen Vnterthanen / Haß / Neid / vnd  
sonst täglicher widerwertigkeit / eben zu der zeit / da er diese  
Kirchen hat zu bawen angefangen / Welches er alles mit ge-  
dult getragen / vnd wol gewust hat / Wenn die Israeliter  
wollen Kirchen bawen / so müssen sie mit einer Hand Arbei-  
ten / vnd mit der andern / wider ihre Feind vnd Widersas-  
cher Streiten. So nam er alles / was ihme Gott zu erinne-  
rung seiner Sterblichkeit auffleget / gern vnd willig an / Mer-  
cket vnd wuste darbey / daß sein leben ein Ziel hette / vnd er  
davon müste / so gewiß / das er vns alle Hoffnung vnd  
Trost seines lenger lebens / zeitlich auß dem Munde nam /  
vnd den Tag seines absterbens errathen köndte.

Nehem. 4

Psal. 39.

O Wie selig ist doch der Man /  
Dem Gott ein vernünfftig Ende gahn /  
Bist du Mensch klug / denck oft daran /  
Ruff Gott darumb getrewlich an.

3. Wenn GOTT in ein Land vnd Gemein greiffe /  
nimbt vns solche Leut / auff die wir alle billig ein Aug / vnd  
sie gern lenger gehabt hetten / Wil er vns damit lehren / Daß  
wir vnser vertrauen / nicht allein auff blosser Menschen / son-  
dern auch / vnd zu förderst sollen auff Gott setzen / der sie vns  
gibt vnd widernimbt / Er aber kan da sein vnd helffen / wenn  
sie weichen vnd nachlassen. Drumb istts gut sich auff den  
HERRN verlassen / vnd nicht auff Menschen / HERR schaff  
du vns Beystand in der Noth / Menschen hülf ist keine nütz /  
Wenn

Psal. 118.

109.  
Wenn wir ihr am meisten bedürffen / so ziehen sie fort / vnd  
lassen vns dahinden. Mit Gott wollen wir thaten thun / Er  
wird vnser Feinde vntertretten / vnd sich wider die jenigen  
mächtig setzen / die vns forthin gedencken zubeleidigen / oder  
wol des früzeitigen Todfalls / in die faust lachen.

4. Sollen wir allweg bey so trawrigem Zustand dieser  
Welt vnd zeitlichen lebens / das immer ein harten Puff ü-  
ber den andern außstehen muß / vrsach nehmen / vns nach  
einer andern Herberg zu sehnen / Weil doch die jekige wil  
vergenglich seyn / vnd vns die leng nicht leiden.

Demnach pflegen wir vns also einzurüsten / vnd bau-  
en die Leut / als wolten sie Ewig leben / oder wie der Teutsche  
Reim spricht: Wir bawen alle fest /

Sein doch nur frembde Gäst /

Vnd do wir Ewig solten seyn /

Da bawen wir gar wenig eyn.

Vnter des schleicht vnd steigt der Todt / wie ein fürs-  
sichtig wachender Kriegsman / stillschweigens bey vns ein-  
nimbt einen nach dem andern / ehe wirs gewahr werden /  
vnd handelt seiner gewalt vnd Kühheit nach / gröber / denn  
ein öffentlicher Landdieb / der nimbt vns Belt vnd Gut /  
das können wir mit der zeit wider gewinnen / dieser graß  
nach Leib vnd Leben / nimbt vns die besten Freund hinweg /  
die wir nicht mögen widerumb hieher zu vns bringen / vor  
aller feinde anlauff / können wir vns etwas schützen vnd auff-  
halten / sed aduersus mortem, omnes urbem mœnibus ca-  
rentem incolimus / Aber der Todt kan alle Mawern nider-  
werffen / oder über dieselben zu vns hinein steigen / vnd die  
Herberg raumen heissen / das wir nicht wissen / wie lang /  
vnd wo wir heut über Nacht bleiben sollen. Ey so mustu lies-  
ber Mensch / nicht so sicher in tag hinein leben / sondern dir

E iij

bey

103.  
bey zeit / ein andere Wohnung bestellen / die du mit freuden  
nach selig erlittenem Todt magst einnehmen /

Der ist doch gewisz / vngewisz der Tag /

Die Stund auch niemandt wissen mag /

Darumb fürcht Gott vnd denck darbey /

Das ein jede Stund die letzte sey.

### Vom Andern.

Weinen vnd Trawrens / wo Noth vnd Todfall / ist über  
die massen vil / vnd wenn vnter vns gegenwertig betrübe  
ter Zustand nicht erweichen / oder zu Weinen will verursa  
chen / der muß ja gläserne Augen / vnd ein steinernes Herz  
haben: Weinen ist vns warlich noth / vnd wunder nicht /  
daß wir sehr matt vnd Daumelhaftig worden / wer kan vns  
denn wider stärcken? Ist keine Salb in Gilead / den schaz  
den vnsers Landes / vnd Zustandes zu heilen? Oder hat  
Gott nichts mehr in seinem Becher / betrübte Herzen damit  
zuerquickten? Ja liebe Christen / David weiß sich in Trübsal  
auch zuerinnern / wo er soll Trost nehmen / vnd sich wider  
auffrichten / Nemblich bey Gott dem H Erren / der verwun  
den vnd heilen / betrüben vnd erfrewen / Todten kan / vnd  
Lebendig machen / zu dem will er sich kehren / vnd verlassen.

Jerem. 8.

Pfal. 60.

Pfal. 119.

Pfal. m. 75.

1. Auff sein Wort / damit Er sich noch hören lest / vnd  
bey im geblieben ist. Gott redet in seinem Heiligtum /  
desß bin ich fro. Wenn Menschen ombkornen / so bleibt Er  
Gott von Ewigkeit zu Ewigkeit. Wenn sie stillschweigen / so  
hebt Er an zu reden / das es David im Heiligtum vñ ganken  
Königreich hören muß / das helt er für sein besten Schaz / vnd  
spricht: Es mög sonst alles hinfahren / nur Gott der H Er  
mit seinem Wort soll bey ihm bleiben. H Er wenn ich nur  
dich hab / so frag ich nichts nach Himmel vnd Erden / Wenn  
mir

mir gleich Leib vnd Seel verschmachtet / bistu doch Gott als  
lezeit meines Herken Trost vnd mein Theil. Freylich wol  
ist das die beste Arzenei / über die Wunden betrübter Her-  
ken zu legen / davon sie Krafft vnd Wissenschaft bekommen /  
Das was mit Gottes willen vnd zulassung geschicht / soll  
man gedultig tragen / wie Ers auffleget / vnd gedenccken /  
Er kan geben / vnd hat macht wider zunehmen / kan dennoch  
ein guter Gott vnd Vatter sein vnd bleiben.

Hiob. 1.  
Hiob. 2.  
Hiob. 3.

2. Auff sein Allmächtigkeit / die ihn noch schützen / bey ü-  
brigen Land vnd Leuten lenger erhalten. Denn Gilead  
ist mein / mein ist Manasse / Ephraim ist die  
Macht meines Hauptes / Juda ist mein Fürst /  
Moab ist mein Waschtöpfen / etc. Hab ich doch nicht  
alles verlohren / vnd ist noch etwas überblieben / will ein weil  
mit dem vorlieb nehmen / Gott kans alle tag mehr vnd  
besser bescheren.

Hiob. 3.

3. Auff sein Barmherzigkeit / die alle Morgen new / vnd  
sich den Zorn nicht gar übergehen lest / wenn helffens zeit vnd  
noth vorhanden ist / Denn wer wird mich führen in  
ein feste Statt? Wer Gleitet mich biß in Edom?  
Wirstu es nicht thun / Gott / der du vns verstößest  
Du bist nichts denn lauter Gut / vnd hast ja vorhin mehr  
gethan / ich weiß du wirsts jetzt auch nicht lassen.

Hiob. 3.

Hat nun Gott vor zeiten mit David geredt im Heilige-  
thumb / vnd ihme in Trübsal Trost mitgetheilet / so will  
Er eben jetzt nicht auffhören / redet auch allhier vnd lest reden  
in seinem Heiligtumb / Das erst von newen / vnd gleich noch  
nicht gar außgebawet ist. Was redet Er denn? Fürnemlich  
Dreyerley.

Hiob. 3.

Einmal von kräftigen Trost / den bey gegenwertigem  
Trawere

Hiob. 3.



- Trawersfall / die ganz Adelige Freundschaft / sonderlich  
 die betrübe Frau Wittib / vnd ihre Kinder sollen steiff fass-  
 sen / vnd wissen / daß sie noch nicht gar verlassen / ja erst recht  
 Gottes Kinder werden / Ihn zum Vatter haben / viel mehr  
 vnd neher / dann die liebsten vnd besten Freund auff Erden.  
 Die reissen auß / so tritt Er ein / wil ewer Gott vnd Vatter  
 seyn. Kuff mich nun an du liebes Kind / Ich wil dich erhören /  
 Psalm. 50. wil allzeit dein Helffer seyn / drum das du kennest den Na-  
 Psalm. 91. men mein / Mein Heil wil Ich dir zeigen. Hör liebe Wittwe /  
 vnd laß den Trost bey dir recht einwurzeln / Er wirdt dir als  
 les Lend geringern / Schutz vnd Schirm / Lieb vnd Freunds-  
 schafft / Treu vnd gehorsam / allhier noch zugewarten / übers-  
 flüssig zeigen. Wo denn?  
 1. Bey Gott dem Herrn / der sich forthin wil deiner mecht-  
 rig annemen / vnd denen / die dich gedencen zubeleidigen / das  
 Exod. 22. mit ernst gesagt haben: Ihr solt keine Wittwen beleidigen.  
 Wirst du es aber thun / sey wer du wilt / so werden sie zu mir  
 schreyen / vnd ich werde ihr schreyen erhören / Ewere Weiber  
 vnd Kinder auch zu Wittwen vnd Waisen machen. Die  
 Syrac. 35. Threnen der Wittwen fließen wol über die Backen herab /  
 sie schreyen aber über sich / zu Gott / wider den / der sie heraus-  
 dringet. Wenn alle Wasser gegen Thal lauffen / sol diß zu  
 Himmel steigen / vnd Gott deine Noht verkündigen / der  
 wirdt die Schadenfro gebürlich straffen / Dich vor ihnen ges-  
 waltig schützen vnd handhaben / allein du must Ihn auch / wie  
 1. Tim. 5. Paulus vermahnet / vmb Hülff vnd Beystand getrewlich  
 anruffen.  
 2. Bey guten Freunden vnd Verwandten / die bisher in  
 fröligkeit zu dir kommen / vnd billig ist / daß sie in Trawrig-  
 keit dich auch besuchen / Lieb vnd freundschaft genießlich emp-  
 finden lassen. Seyt frölich mit den Frölichen / spricht S.  
 Rom. 2. Paulus /

105.

Paulus / vnd Weinet mit den Weinenden. Schaffet den  
Waisen recht / vnd helfft der Wittwe sachen / spricht Esaias.  
Ist nicht nur essen vnd trincken / von guten Hunden vnd  
schönen Pferden etwas reden / sondern das fürnembste / der  
Wittwen / Kinder / vnd armer Vnterthanen Heil vnd bestes  
bedencken vnd fördern. Esaiæ. i.

3. Bey deinen Kindern / die als adeliche Pflanzlein lieblich  
daher wachsen / Vnd wann sie also in Gottesfurcht bleiben / dir  
manch lange zeit vertreiben / ja gute hoffnung machen / noch  
Ehr vnd Frewd an ihnen zulerben. Darzu wirdt ihnen  
ihres lieben Vattern guter Nam vnd trewe dienst / bey vielen  
mechtige hülff vnd förderung verursachen / Allein Gott re-  
det das auch in seinem Heiligthumb / vnd wil / das Kinder sol-  
len immer Mutter gehorsam seyn / sie lieb vnd werth haben /  
wie das Vierde Gebot erfordert / vnd es Syrach erkleret: Syrac. 7.  
Ehre deinen Vatter von ganken hertzen / vnd vergiß nicht / Syrac. 23.  
wie sawer du deiner Mutter worden bist / vnd dencke / daß du  
von ihnen geboren bist / vnd was kanst du ihnen dafür thun /  
daß sie an dir gethan haben? Vergieß nicht deines Vatters Syrac. 3.  
vnd deiner Mutter lehre / so wirst du vnter den HERN sitzen /  
vnd wirdt dein nicht vergessen / sondern in der Noht gedacht  
werden. Wie ein gehorsamer Knab in der Schul / von seinem  
Præceptore werth gehalten / promovirt vnd gefördert wird / Esaiæ 49.  
Also wil Gott dein auch nit vergessen / dich auß dem Staub Psaln 113.  
erheben / vnd dein Haupt auffrichten. Psaln 4.

4. Bey vns armen Vnterthanen / die dir vnd den deinen /  
forthin nichts weniger / denn verhoffens bisher geschehen /  
vnterthenige Lieb vnd Trewe / gehorsam vnd handreichung  
zu leisten schuldig seyn. Wirdt jemandt sich des widerwer-  
tigen vntersehen / vnd gedenden / nun hab er freyen Paß be-  
kommen / es sey die Rag nit daheim / wie grobe Esel reden / vnd  
gehen

gehen die Mäuf auff Bäncken / der soll wissen / daß Gott dein Ober Herr / vnnnd neben Ihm / nicht nur einer / sondern noch etliche Auffseher verordnet / die ihme acht auff die garn haben / vnd keinem nichts werden vnter die Banck stosen.

Darnach redet Gott noch eines in seinem Heiligtumb vnd lest einer fast vnrichtigen Frage / die sich vnter vns erhoben / mit einer richtigen Antwort begegnen. Denn wie muß kommen / daß der von Giech seine Kirchen nicht gar außgebawet? Hette den Baw wol vnterlassen / vielleicht möchte er noch leben. Vnrecht liebes Volck / in zweyen stücken. Den 1. Nichts lenger hat er derhalb leben / oder deßhalb ehe nicht sterben mögen / Was er auch sonst hette gutes gethan vnd gebawet. Wenn Sterbenszeit vnd Stund vorhanden / ist deß Todes niemandt gefreyet. Ein Handwercksmann arbeit den ganzen Tag / biß in die Nacht hinein / wirdt er damit überfallen / so muß er Feyerabendt machen / vnnnd wol die halbe arbeit liegen lassen. Vnsern lieben Junckherrn vnnnd Bawherrn dieser Kirchen / hat die Todes Nacht auch erwischet / vnd ihme zu ruhe geboten / ehe dann das Werck vollendet worden: Vnd ist viel besser / das er mit disem Kirchensbaw / der viel guter gedancken bey ihme verursachet / sein Leben hat beschlossen. Dann wann mancher bey fressen vnnnd sauffen / durch hader vnd balgen / mit vollem Bauch vñ leerer Seelen / ohn alle Buß vnnnd Versöhnung dahin gehet / wie oft / vnd mehr denn gut ist / zugesehehen pflaget.

2. So ist es Gottes Will vñ Wolgefallen / ihn / über dem Christlichen Baw / hinweg zunemen / auß vrsachen / die ihme bekandt / vnd vnwonnohten ist / daß wir sie alle wissen. Mehrmal hat ers also weißlich practiciret, dadurch die Nachkommen auch zum Gottesdienst / vnd guten wercken verursachet.

Num. 27. Moyses soll die Kinder Israhel auß Egypten ins gelobte Land führen /



Kirchen haben/ vnd das alt Sündliche wesen immer fortan  
treiben/ das wirdt sich übel zusammen reumen/ vnd Gott mit  
vns die leng nicht eins bleiben. Helffe Gott / daß wir vns als  
le bessern.

Anlangend nun lieben Christen/ vnsern lieben Junckz  
herrn / Weyland Georg Dieterichen von Giech / 2c. So ist  
derselbe/ wie ihr wisset/ des Alten Adelichen Geschlechts von  
Giech/ Anno 1562. Frentag den 4. Septemb. zwischen 1. vnd  
zwey Uhr nach Mittag zu Wisentfels/ von Fraw Barbara  
von Giech/ Geborne von Schaumberg/ als seiner Adelis  
chen Mutter/ auff dise Welt geboren/ Dessen Herr Vatter/  
Weyland/ der auch Edle/ Bestreng / Ehrvest vnd Hochge  
lahzte Hanns Christoff von Giech/ beyder Rechten Doctor/  
ein lange zeit in ansehnlichen Herrndiensten gebraucht wor  
den/ Drey Töchter vnd zwey Söhne hinderlassen/ die beyde  
etwas gelernet/ vñ dem Fürst. Sächs. Hofgericht zu Coburg/  
löblich beygewohnet / Aber sich nun mehr alle Geschwistere  
auß diesem Leben darvon gemacht haben.

Fürstl.  
Durchl.  
Branden-  
burg Rath  
Hof:land:  
vnd Lehen-  
Richter zu  
Dnolk,  
bach.

Seines täglichen lebens halben / ist er zwar nicht En-  
gelrein / vñnd auch mit angeborn Menschlicher schwachheit  
beladen/ die er offt geklaget/ vnd bey sich befunden/ Aber doch  
mit Gaben von Gott gezieret gewesen/ die sich nicht bey jeders  
man finden / vñnd der wir billig / so viel sich auff der Cankel  
leyden wil/ gedencken. Denn

Von Jugendt auff / ist er still vnd eyngezogen / fromb  
vnd Gottsfürchtig gewesen/ hat gern Gebetet / vnd Gottes  
Wort fleissig gehöret/ Das ist ihm in der Haushaltung vnd  
Ehestand / da es auch Betens bedarff / noch angehangen/  
das er mit seiner Adelichen Hausmutter vñnd Kindern alle  
Morgen vnd Abendsegen Gebetet / fleissig zu Kirchen ganz  
gen/ vnd keine Predigt hie oder anders wo versäumet/ es hab  
in denn

in denn Noht vnd Leibeschwachheit daran gehindert/ Bot-  
 ten hat er mit Brieffen / die Son vnd Festtage vngern  
 gesehen/ vnd ohn sonderer noht keinen abgefertiget. Mancher  
 ligt die ganze Wochen in Tagleistung vnd handlung / die  
 Sonntag muß er reisen / vnd die Hohensfesttage / wegen  
 schlechter händel / Boten ausschicken. Das Dritte Gebot  
 heist: Memento, besinne dich/ wo du in der wochen bist / vnd  
 gedencke des Sabbaths / das du ihn heiligest. Lutherus  
 wann er die Sonntag reisen mußte/ vnd vor die Kirchen kam/  
 da man eben prediget/ stieg er allweg ab/ vnd höret das Evans-  
 gelium / oder ein Pünclein auß der Predigt. Jener Christ-  
 liche Juncfherr / wann seine Vnterthanen die Sonntag  
 mussten verschickt werden/ befahl er ihnen/ wo sie für Kirchen  
 hingiengen/ daß sie das Evangelium hören/ oder ihme sonst/  
 wann sie heimkamen/ sagen mussten/ was sie auß der Predigt/  
 da vnd dort/ gelernet vnd behalten hetten.

Fürwar man kan nicht besser/ man laß vnserm HErrn  
 Gott seine Feyertag / so lest er vns vnserer Wercktag zu gut  
 kommen/ wil mans umbkehren/ so kan doch wenig oder gar  
 nichts fruchtbarliches/ in allen sachen außgerichtet vnd vol-  
 lendet werden.

In allem thun vnd wesen dein/  
 Laß Gottes Wort den Anfang seyn/  
 Suchst du ein andern Anfang/  
 Geht all dein thun den Krebsgang.

Im Ehestand / darein er Anno 1588. Acht tage vor  
 Pfingsten/ mit Jungfraw Maria von Schaumberg/ seiner  
 gegenwertigen Adelichen Haus Mutter/ vnd nun mehr hin-  
 tertastnen Wittib/ sich begeben/ hat er mit derselben 19. Jar/  
 vnd 10. Wochen friedlich zugebracht/ Sieben Kinderlein ge-  
 zeuget/ der noch Fünff/ Zwen Sohn/ vnd drey Töchter/ am  
 leben/

D iij



leben / vnd hie zugegen seyn / die er zu Gottes furcht bißher  
fleißig erzogen / vnd ihnen mit gutem Exempel für geleuchtet  
hat / darinnen sie billig bleiben / auffwachsen / vnd des Vaters  
Zucht nicht sollen hindan setzen.

In der Haushaltung / vnd gegen all den seinen / ist er  
zwar ernstlich / aber doch darbey sittig / mehr zugelind / denn  
geschwind gewesen / vnd also hat ers mit seinen Dienern ges  
halten / Daß wann dieselben von ihm kommen / sich immer  
wider zu ihm gesehnet haben / Ich bin derselben auch einer /  
vnd nun zehen Jahr vmb ihn gewesen / darff nicht sagen / das  
er mir jemal ein ernstlich böses wort gegeben. Mit saur sehen /  
wincken / vnd langmütigkeit bringt man manchen auch zu  
fleißiger auffachtung vnd fürsichtigkeit. So stehet es fein  
vnd besser / wenn man sagt / Der sitzame Haushatter / hat als  
te Diener / die 10. 20. 30. vnd mehr Jahr / bey ihm / vnd in sei  
ner Haushaltung gewesen / Denn wenn man sagt / das ist  
ein wunderlicher Haushatter / kan niemandt mit ihm über  
ein kommen / es wirdt ime nicht leichtlich ein Diener frant /  
sie müssen ihren Kirchhof zu Rom oder an andern orten su  
chen. Die Herren fehlen bißweilen auch / vnd wer glaubt / das  
er kan irren / der mag einem Irrenden etwas zu gut halten /  
mehr mit Worten / denn mit schlägen zu recht bringen. *Didi  
cisse fideliter artes*

*Emollit mores, nec sinit esse feros,* sagt der Poët /

Die freyen Künst gelernet han /

Macht einen fein glimpfflichen Man /

Der alle ding zum besten lehrt /

Vnd nicht flugs oben hinauß fehrt.

Sein End vnd Absterben / ist ihm durch ein Alderlaß  
entstanden / vnd auß beschehener verwahrlassung / so übel ges  
rahnen / das Er darüber die Seel außgelassen. Obs nun der  
jenige /

jenige/durch welchen es verursacht/auß vnverstand/leicht-  
fertigkeit/oder wie es seyn mag / (Er hat bey seinen Patien-  
ten gehalten/wie der Has bey dem Drummelschläger/vnd ihn/  
wiewol fleißig gebeten/ niemals besucht) gethan hat / wirdt  
er am besten/ vnd zwar dasselbe vor Gott vnd der Obrigkeit  
zuverantworten wissen. Error ipsius, nunc terra sepelitur,  
aber in seinem Gewissen / wann er etwan schuldt dran hat/  
wirdt sichs fürwar so bald nicht vergraben vnd vergessen las-  
sen. Cautius in posterum mercari disce. Der verletzte Arm  
hat vnserm lieben Junckherrn so hart zugesezt / das er end-  
lich sein Leben darüber gelassen/ Vnd Sonntag den 26. Jus-  
lii/ Abends vmb 5. Uhr/ zu Bamberg in seiner Behausung/  
mit grosser gedult vnd sanfftmuth/ Darumb er in wehrender  
schwachheit / die sich auff 9. Wochen/sein ganzes Alter auff  
45. Jar/weniger 5. Wochen erstreckt/ stets Gebeten/inter  
preces & lacrymas, Christlichen Todes verschieden ist.

Wie nun lieben Christen? Können wir auch mit übers-  
mehigem Trauren/ vnsern abgeleiteten lieben Junckherrn/  
widerumb hieher zu vns bringen? Nein gar nicht / Drum  
lest vns Gott / zum Beschluß / noch eines in seinem Heilig-  
thumb anzeigen / Das wir vns nun mehr zu frieden geben/  
seinen Willen/der allezeit der beste ist / vns in Frewd vnd  
Leyd sollen wolthun vnd gefallen lassen. Et mors, quam im-  
mortalitas sequitur, lugenda non est, Den Todt / auff  
den ein ewig seliges Leben folget / soll man nicht Beweinen.  
Er ist nun ein rechter GEORGIUS vnd Christlicher Ritter/ 1. Tim. 1.  
der die Welt überwunden/ein guten Kampff gekempfft / den 2. Tim. 4.  
Glauben vnd ein gutes Gewissen behalten/Sich nun hat  
Gott ergeben / Ewig mit Ihm zu leben/da wil er vnser aller  
mit freuden erwarten. Ey so schlaff vnd ruhe nun du Edles  
Blut/ob vns gleich allen / dein vnzeitiger Todt vnd Abster-  
ben/

D. iiii

ben/

ben/ herzlich vnd schmerzlich wehe thut/ Wollen wir doch ob  
 Gott will/ am Jüngsten Tage dich wieder sehen / vnd zu dir  
 kommen in die Ewige Freud vnd Seeligkeit. Dahin  
 helff vns auch allen Gott Vatter/ Sohn/  
 vnd Heiliger Geist / hochgelob  
 bet in alle Ewigkeit/  
 Amen.



**H**erzlich thut mich verlangen/  
 Nach ein seligen End/  
 Weil ich hier bin umbfangen/  
 Mit Trübsal vnd Elend/  
 Ich hab lust abzuseiden/  
 Von dieser bösen Welt/  
 Seh'n mich nach ewiger freuden/  
 O Jesu komm nur bald.  
 Du hast mich ja erlöset/  
 Von Sünd/ Todt/ Teuffl vnd Höll/  
 Es hat dein Blut gekostet/  
 Drauff ich mein Hoffnung stell/  
 Warumb solt mir denn grauen/  
 Fürm Todt vnd Hellisch Esind/  
 Weil ich auff dich thu barwen/  
 Bin ich ein selig Kind.

Wenn gleich ist süß das Leben/

Der

Der Todt sehr bitter mir/  
 Will ich mich doch ergeben/  
 Zu sterben willig dir/  
 Ich weiß ein besser Leben/  
 Da meine Seel sehrt hin/  
 Desß frew ich mich gar eben/  
 Sterben ist mein Gewin.

Der Leib zwar in der Erden/  
 Von Würmen wirdt verzehrt/  
 Doch aufferwecket werden/  
 Durch Christum wirdt verflert/  
 Vnd leuchten als die Sonne/  
 Leben ohn alle noht/  
 In Himmels Frewd vnd Bonne/  
 Was schadt mir dann der Todt?

Ob mich die Welt auch reizet/  
 Lenger zu leben hier/  
 Vnd mir auch immer zeigt/  
 Ehr/ Gelt/ Gut/ all ihr zier/  
 Doch ich desß gar nicht achte/  
 Es werth ein kleine zeit/  
 Das Himlisch betrachte/  
 Das bleibt in Ewigkeit.

Wenn ich auch gleich nun scheide/  
 Von meinen Freunden gut/  
 Daß mir vnd ihn bringt leyde/

D v

Doch

Doch tröst mir meinen Muth/  
 Daß wir in größern freuden/  
 Zusammen kommen schon/  
 Vnd bleiben vngescheiden/  
 In Himmelfischen Thron.

Ob ich auch hinterlasse/  
 Betrübte Kinderlein/  
 Der noht mich übermässe/  
 Jammer im Herzen mein/  
 Will ich doch gerne sterben/  
 Vnd trawen meinem Gott/  
 Er wird sie wol versorgen/  
 Ketten auß aller noth.

Was thut ihr so sehr zagen/  
 Ihr armen Wäiselein/  
 Solt euch Gott hülff versagen/  
 Der speist all Thierlein klein/  
 Frommen Wittwen vnd Wäisen/  
 Ist dieser Vatter trew/  
 Er wirdt euch hülff beweisen/  
 Das glaubt ohn alle schew.

Gesegn euch Gott der H. Erre/  
 Ihr viel geliebten mein/  
 Trauret nicht allzu sehre/  
 Vber den Abschied mein/  
 Bestendig bleibt im Glauben/

Wir

Wir werden in kurzer zeit/  
Einander wider schauen/  
Dort in der Ewigkeit.

Nun ich mich gänzlich wende/  
Zu dir HErr Christ allein/  
Gib mir ein seligs Ende/  
Vnd send dein Engelein/  
Führ mich ins ewig Leben/  
Das Du erworben hast/  
Dich/ für mich / vntergeben  
Der schweren Sünden Last.

Hilff das ich mich nicht fehre/  
Von dir HErr Jesu Christ/  
Den schwachen Glauben mehre/  
In mir zu aller frist/  
Hilff mir ritterlich ringen/  
Dein Hand mich halte fest/  
Das ich mög frölich singen/  
Das Consummatum est.

E N D E.



9.

QK.295


Christliche  
 Bey trawrigem  
 Begrä

**DEB**  
 Edlen / Bes  
 Ehrvesten / Ged  
 Siech / zu Wisentfel  
 Fürst. Sächs. Hof  
 Assessor

Welcher Sonnta  
 Abends umb 5. Uhr  
 Behausung / seligen Todes  
 den 4. Augusti in Kröge  
 ten Kirchen Christlic  
 worden / 2

Gehalten  
 M. Paulum Luziur  
 Getruckt zu Coburg

ANNO M



BIBLIOTHECA  
 TONICIAVIANA

ATS-BIBLIOTHEK  
 ALLE  
 (E)

68

